

Verkeerde clup

n verhaal ien t Grunnegers deur Bé Kuipers

Zo'n tien, twaalf joar leden was ik veur mien waark as baauwkundege betrokken bie herienrichtensprojecten van n poar kantoren ien Zwolle. De gewone, traditionele iendailen van n kantoor, zoalen mit bureaus en koamers veur boazen, werd haildaal omgooid en der kwamen apmoal zogenoamde flexibele waarkplekken, ofwel 'flexplekken'.

Waarkplekken ien ale soorten en moaten. En ook koamers ien ale ofmetens, veur elke soort van waark n apaarde roemte. Olle stainen muren en aander schaaidsenwanden mozzen doarom oetbroken worden en der kwamen nije iendailens mit nije systeemwanden veur ien ploats. En ale verlichten ien de vörm van tl-buizen mos ook vot.

Dij nije ienrichten was ook n stuk luxer as doarveur. Overaal de snelste computers, veul apaarde en modieuze verlichten. Moderne bureaustoulen, ien ale standen te verzettenen, en ook bureaus dij ien hoogte verstelbaar waren.

Wieder n mooi ienrichte kovviehouk, kunst aan muren (kopieën, dat wel, t kin wel op...) en weelderige plantenbakken overaal. Mor t belangriekste onderdail van dit idee waren - en bennen nog altied - flexplekken, want dij worden tegenwoordeg aal meer bie grode kantoren toupasd.

Ien traditionele kantoren is gemiddeld n daarde tot haalfschaid van de bureaus onbezet. Dat komt omdat de aine waarknemer zaik thoes zit, n aander n vrije dag of vekaanzie het, weer n aander veur overleg of n vergoadern op n aander kantoor is en nog weer n aander op locoatsie is veur n ienspectie of zo - en dus ook nait op kantoor is.

Bie dit nije systeem bennen der veul minder waarkplekken as dat ter personeelsleden bennen. Ien n kantoor mit flexplekken kin men dus mit veul minder roemte tou. En dat scheelt bie grode kantooren nogal wat en is dus ook n stuk gekoper, ondanks aal dij luxe. Ien t begun docht ik dat dizze nije kantooraanpak hail goud veur t personeel wezen zol. Want zo wer wel t brocht.

Flexibeler, gemakkelker en effectiever waarken. Meer contacten, nait vaastrousten op joen aigen stee, creatiever en ienspirerend allerdeegs... En feidelk is doar ook nait zoveul mis mit, as je der aan wend bennen. Mor al gaauw kwam ik ter achter dat dit gewoon n bezunegensmoatregel was mit n mooi verhaal as vlag dij de loaden dekken mos. De hoge pietien hogerop ien t bedrijf wizzen dat netuurlek allaank...

n Groot noadail veur paarie lu is dat je joen bureau of waarkplek nooit tot joen aigen plekje reken kinnen. Aan t end van dag mout ook ales oproemd worden en elk het n ofsloetbaar kastje veur persoonleke zoaken. Aanderdoags zit ter mainstekaans n aander waarknemer. Doarom was en is der voak veul weerstand tegen.

n Groot noadail ien ons geval was ook, dat ter veul te waaineg vergoaderroemtes bedocht waren. Dat was n grode ienschattensfout, want der wer wat ofvergoaderd en ofproat, moien dokter. Meschain wer der wel teveul vergoaderd, der bennen lu dij niks laiver doun. En din bennen summegen hail creatief en gaan op onorthodoxe plekken zitten te vergoadern.

Op n zekere dag, smirregs om drij uur, is der n vergoadern van mien projectgroep ien de zogenoamde huiskamer. Dij hoeskoamer is ook ain van de nije zeginings van dat nije kantoorproject, doar onze projectgroep onderdail van is. Veur de verbaauwens en aander technische dingen, dij dit project tot gevolg het, zit ik ter daarom ien.

Ik ben wat loat en om vief over drij broes ik de hoeskoamer ien. Ik zai dat ale stoulen aan toavel bezet bennen, op ain noa. Bah, te loat kommen, doar ik zulf hail min over kin as aander lu dat doun. Mor nou dou ik t zulf ook. Ook onze veurzitter is der nog nait, zai ik. Roar, dij mout toch ien elk gevál op tied wezen?

Vlug schoef ik noar vrije stoul en pak ien loopweg ook nog even n luk bistrostoultje oet zithouk veur onze veurzitter. "Klaas moet dan maar op zo'n klein stoeltje gaan zitten. Eigen schuld

moet 'ie maar op tijd komen", zeg ik tegen aander lu ien zwakke n pogen om lolleg te wezen. Ientied pak ik mien papperazzen en versloagen oet mien tas, leg ze op toafel veur mie hin en wacht op de dingen dij gebeuren goan.

Pas dén vaalt mie op dat t doodstil is, elkenain holdt hom stil. Ze kieken apmoal verboasd noar mie en mien gehaspel. Ik oarzel en vuil n beetje natteghaid... Ik zai n poar bekende collegoa's, mor nog meer onbekenden. Ik heb nog gain dudelk idee dat ter wel ais wat mis wezen kin. Den zegt ter ain: "Ben je niet in de war?" Huh..., ik ien de war?

En den dringt woarhaid langsoam tot mien besef deur. Oei, dit is nait de goie clup! Ik heb zomor rompsloms ienbroken ien n vremde vergoadern en ben gewoon bie heur aan toavel zitten goan, of ik ter bie heurde. En der den ook nog n stoultje bieslepen... Dat zel dij lu wel hail roar tou west hebben.

Ik mainde achterof aal dat ter wat vremds was, mor nait luustern netuurlek mit mien domme kop. En dat bieainkomst van mien aigen projectgroep net op t leste mement verplaatst is, is bliekboar ook nait tot mie deurdrongen. Ik zit letterlek en figuurlek hail aargens aans. Ik prommel wat verontschuldegings, griep mien pepierderij bie nkander en zet gaauw dat stomme bistrostoultje weerom.

Hou kin dat nou, want ik herkende de toch n stuk of wat van mien aigen collegoa's? En waarom zaag ik dij vremde mensen den nait eerder? Der wordt hier en doar wat lagd en ain zegt: "Blijf gerust zitten hoor, wij doen niks geheimzinnigs." Kop wordt mie rood en swait brekt mie oet. Ik stoa veur poal en ik vuil mie n grode luhannes!

En toch heb ik n excuus. Dizze hoeskoamer is nait bedould as vergoaderroemte. Elk mag der zo ienlopen, zunder te kloppen. Voak staait deur ook open, want dit is n multifunctionele roemte, mit n bibliotheek mit wat noaslagwaarken, n poar fautails, n zitje mit n stukofwat bistrostoultjes, n kovvieautoomat en gezellege verlichten. Om even ienformeel mit ain of twij collegoa's te overleggen.

Aigelk bennen de lu dij hier nou zitten zulf ien overtreden, om dizze roemte te gebruiken veur heur vergoadern. Doar is dij nait veur bedould. n Geruststelende gedachte, zo slim fout was ik dus ook weer nait. Ik huif mie doarom feidelk nait te schoamen.

Mor ik verwiet miezulf wel dat ik eerdere signalen nait opmaarkt heb. En dat ik nait even mien e-mail noakeken heb veurdat ik noar mien vergoadern ging. Gaauw moak ik dat ik vot kom en dou deur van hoes-koamer stief dicht. Ik heur ze te deur hin nog boldernd laggen en ik schoam mie toch n beetje....

t Haar traauwens mor n hoar scheeld of mien aigen projectgroep haar hier wel gewoon vergoaderd en zol den feidelk ook ien overtreden west hebben. Mor de groep dij der nou zit het mien veurzidder bliekboar omproaten kind en nou mouten wie op zuik noar wat aans.

Ook hier geldt tegenwoordeg al t recht van de staarkste. Ien tegenstellen tot vrouger, dou gol t recht van de eerste... En ientied wordt de 'huiskamer' dus aal voaker onaigelk bruukt.

Groninger verhalen online

De eerder verschenen Groninger verhalen van Bé Kuipers staan 'los' online via:

 www.contactblad.info/groningerverhalen.html

Vervuilde wissel veroorzaakt storing

Dat was de verklaring van ProRail op vrijdag 27 februari voor de wisselstoring op de trajecten Groningen - Roodeschool en - Delfzijl. De vraag is of iemand dit moedwillig heeft gedaan. Dat zullen de passagiers diegene zeker niet in dank afnemen. Maar een andere mogelijkheid is aan de zwerf geraakt huisvuil. Vlak voordat de storing optrad zijn in Sauwerd vlakbij de wissel de grijze containers geleege. Daarbij wil nog wel eens wat tussen bak en wagen vallen.